

बक्करे दी आत्मकथा

□ सत्यपाल शास्त्री श्रीवत्स

मेरी बक्करा जाती ऐ। मेरे मादा रूप गी बक्करी आखदे न ते बच्चे गी छिल्ला छिल्ली शायद में बै- बै करियै बोल्लियै अपनी भाशा व्यक्त करनां ते इससै बोल्ली कन्नै अपना अभिप्राय व्यक्त करना तां गै मिगी बक्करा आखदे न। मेरी जाती दा नां बक्करा दी व्युत्पत्ति इस चाल्ली ऐ = बै + कर → ब + करा = 'बक्करा' अर्थात् जेहड़ा बै-बै करदा ऐ ओह बक्करा खुआंदा ऐ। पर संस्कृत भाशा आहलें विद्वानें मेरा नां 'अज' पता नीं कियां रक्खी दित्ते दा ऐ जिसदा अर्थ ते जेहड़ा पैदा गै नेई होंदा (न जायते इति अज) एह नां ते स्त्रिष्टी कर्ता ब्राह्म दा ऐ। ब्रह्मा दा एह नां ते उसदे व्यक्तित्व दे अनुरूप ऐ की जे ओह अजन्मा ऐ अर्थात् जन्म-मरण दे चक्करें कोला परे ऐ। पर में ते केई बारी जन्म लैन्ना ते केई बारी मरना अर्थात् अपनियां मौती घट्ट जद के मेरा मास खाने आहलें द्वारा मैं केई बारी मारेआ जन्नां + अर्थात् कुतै ल्हाल तरीके कन्नै ते कुतै छुरें जां दराटें बगैरा कन्नै मारेआ जन्नां। मेरी इस बद-किस्मत जाती दा नेहा कोई लक्खें चा इक होग जेहड़ा अपनी सभावक मौत कन्नै मरदा ऐ, नेई तां मैं ते मेरे साथी इक पाससै जन्म लैन्नै आं ते दूऐ पाससै केई लगी पौंदे अपनियां-अपनियां जीह्बां पलैन, केई देवते दे नां पर ते केई ब्याह ते पुत्र जम्मेने ते उंदे सूतरे, बगैरा दे मौके पर साढ़ियां बर्ली देइयै अपने सुआद पूरे करने दे मनसूबे बनान लगी पौंदे ते केई ध्यारें दे मौके पर साढ़ियां बर्ली देने आस्तै साढ़ा पालन-पोशन शुरू करी दिंदे ते केई अपने बपार आस्तै (यनी असें गी मारियै बोटी-बोटी करियै बेचने आस्तै असेंगी पालन लगी पौंदे न) बगैरा बगैरा केइयें खानदानें च ते पैह्ला पुत्र जम्मेने पर जेहड़ा अपने देवतें दे बधोकरा (अर्थात् बधाई दा बक्करा) चाढ़ने दा रवाज ऐ ओह ते घर-पाले दा छिल्ला-बक्करा चाढ़ना होंदा ऐ। इयां उनें स'ब्बनीं दी मन्शा दा प्रतीकात्मक रूप कन्नै इयै अर्थ ऐ जे कोई ब्हान्ना बनाइयै अपनी-अपनी जरूरता दे मताबक साढ़ियें गाटियें पर ल्हाल ते झटका विधि कन्नै छुरे चलाने।

असें गी मारियै खाने दा इक होर बी अजीबो-गरीब तरीका बी इस माहनू जात ने अपनाए दा ऐ। ओह असल च तान्त्रकें जोगियें मुल्लां, सौगनियें बगैरा दी लालची बृति दी किरपा दा नतीजा ऐ। ओह एह जे जेकर कुसै दे घर कोई जनानी, मर्द, जागत जां कुड़ी कुसै लम्मी जां असाध्य बमारी दा शकार होई जा तां तान्त्रक ते सौगनियें आखदे न जे बमारी दा कारण खोट खटाला, जादू-टूना, जैन्तर-तैन्तर दा प्रमाभ जां देव-कोप ऐ, इस बास्तै ओहकड़ा लाज करोआना जरूरी ऐ। जेकर घरै आहले उंदे चक्करै च पेइयै उंदे थमां लाज करोआने आस्तै हां' करी देन तां तैतरियें-सौगनियें दियां पौं-बारां ते बारी आई जंदी जां कुक्कड़े दी ते जां स्हाड़ी, पर आम तौर पर कुक्कड़-कुक्कड़ु भार-बजन च घट्ट होने करी बची जंदे न ते असें बक्करें दी गै उर्थें मुंडी लगदी ऐ। नेह लाज करने आहले सौगनियें दी उसलै एह दलील घरै-आहलें गी अपना नक्क रगड़ी-रगड़ी मन्ने पौंदी ऐ जे की जे-तुंदे रोगियै गी भूतनू ते जोगनी चंबड़ी दियां गै न, पर कन्नै-कन्नै देव कोप बी होने करी बड्डे मुट्टे बक्करे गी फेरना पौना ऐ। ऐसी हालती च घरै-आहले ते "दुखिया परम सेवका" मुहावरे दे मताबक फसे दे होने करी मन्नी जंदे न ते भाएं कर्जा चुक्कियै गै बक्करे खरीदने पौन खरीदी ल्यौंदे न ते सौगनियें होर कन्नै-कन्नै अपनी जीहबें गी पलैना शुरू करी दिंदे न ते कन्नै-कन्नै अपने इट्टें पर गोहटे गंठे दे मैतरें गी पढ़दे असें गी रोगियें चबक्खै त्रै जां सत्त फराटियां करोआइयै घरै-आहलें गी हुकम दिंदे न जे तुरता ने बल देओ ते सुआरने दा कम्म पूरा करो तां जे भूतें, जोगनीं ते देवतें गी तृप्त कीता जा। उसलै असें गी मारने थमां पैहलें साढ़ियै पिट्ठी उप्पर पानी, चौल ते फुल्ल बगैरा सुट्टे जंदे न। उसलै जेकर अस सभाS दे मताबक अपने शरीरें गी तौले गै ल्हाई झुलाइयै फंडी लैचै तां सारे उसदा अर्थ लांदे न जे बक्करे बिज्जी गे न ते इस लेई भूतें, जोगनीं ते देवतें खुश होइयै बक्करे दी बलि लैना स्वीकार करी लेआ ऐ। जेकर अस उसलै बिज्जनै च बिंद चिर लाई देचै तां साढ़ियें पिट्ठीं खुल्ला पानी सुट्टियै असें गी जबरदस्ती बिज्जने-कम्बने आससै मजबूर कीता जंदा ऐ। कैसा स्वार्थी ऐ माहनू जे साढ़ियें पिट्ठीं उप्पर पानी, फुल्ल, चौल बगैरा पौने कन्नै साढ़ा हिल्लना-कम्बना ते साढ़ी सभावक आदत ऐ पर एह माहनू अपने लालच स्वार्थ दे मताबक उसदा अर्थ अपने ढंगा कन्नै लाई लैदा ऐ। अस उसलै भाएं किन्ना बै-बै करचै ते उंदे राखसी पंजें थमां बचियै नस्सने दी कोशश करचै पर अस उसलै भला कियां छुड़की सकने आं। इस लेई बे-मौती मरने आस्तै मजबूर होई जन्ने आं। इन्ना जरूर ऐ जे जेकर स्हाड़ी बल काली माता दे दरबार अगैं लगा करदी होऐ तां अस थोढ़ा सन्दोख इस लेई करी लैने आं जे शायद मां असें गी इस जून कोला छड़काई देऐ। इस दे इलावा केइयें देवी-देवतें अगैं साढ़ी बल देने थमां पैहलें बी साढ़े कन्नै इयै डांम रचेआ

जंदा ऐ। बस फही चली पौंदे उनें बे-क्यासें दे दराट सहाड़े गाटें उप्पर ते उसदे परैन्त सहाड़ी होई जंदी बोटी-बोटी मुंडियां कुतै, खल्लां कुतै, लत्तां-खरौड़े कुतै, ओझरियां कुतै, गुदें-कपूरे ते कलेजियां कुतै ते दूए अंगें दे टुकड़े कुतै। इयां होई जंदे सहाड़े शरीरै दे टुकड़े माहनू जाती दे इस क्रूर जीवै दे हत्थैं। उसदे परैन्त सारे अपने-अपने पतीले-कड़ाहियां सिद्धियां करियै तड़के पकाइयै लगी पौंदे सहाड़े न्योड़े बनान-कुतै अम्बले, कुतै बे-अम्बले, कुतै जखनीं ते कुतै पालक पाइयै न्योड़े बनी जंदे ते कुतै कबाबा। तांतरकें-सौगनियें द्वारा बमारें उप्परें फेरे गोदे सहाड़े शरीरै दा बेशतर हिस्सा उंदे घर पुजदा ऐ। इस लेई अपनी गुरडम लीला दी कमाई कनै प्राप्त होए दा सहाड़े शरीरै दा मता हिस्सा उंदे घर जिसलै पुजदा ऐ तां उंदा सारा परोआर ते जशन मनाने दे मूड च आई जंदा ऐ।

एह गल्ल सहाड़े आस्तै बिंद सकून आहली ऐ जे मुस्लम धर्म आहले लोक बकरीद जां ईदुलज्जुहा जनेह अपने ध्यारें कोला पैहलें असें गी खूब खलाई-पलाइयै खूब मोटा-ताजा ते तंदरुस्त बनाई लैंदे ना। उस कनै असें गी कम से कम एह तसल्ली ते होई जंदी ऐ जे असें मरने थमां पैहलें खूब खाई-पी ते लेआ ऐ ते इस बारे च अपनियां सारियां रीझां पूरियां करी लेइयां न ते सोचनेआं जे हून कोई पच्छोताऽ बाकी ऐ नेई रेहदा। मुस्लमान लोक असेंगी पालदे मौकै सब थमां प्यारा समझियै उपरोक्त ध्यारें आहले दिनै च अपने अल्ला-ताला गी सौंपदे होए कलामां पढी-पढियै असेंगी ल्हाल करियै मारदे ना। उस बेल्लै भाएं असेंगी जबरदस्त पीड़ ते होंदी गै ऐ पर उंदियें कलामें दा इन्ना जादूई असर सहाड़े पर होंदा ऐ जे अस बस तड़फी-तुड़फियै अपनियां जीहबां बाहर कडिदियै खुशी-खुशी पूरे होई जन्ने आं। केई बारी 'बै-बै' करियै अपने प्राण त्यागी दिन्ने आं। कनै च कलामें दी गुनगनाहट बिंदक सकून जन दिंदी होई बी बिल्कुल प्यारी लगदी। असल च अल्ला-ताला दे नां उप्पर बी अपने सुआद आस्तै सहाड़ा कतले आम करदे न, की जे अल्ला-ताला जां परमात्मा ने अपनी स्त्रिस्टी दे हर जीव गी निश्चत उमर कट्टने आस्तै पैदा कीते दा ऐ। कुसै बी जीव गी बे-मौती कनै मरने आस्तै कुसैगी बी हक्क नेई ऐ दिते दा। परमात्मा ते बड़ा गै दयालु ऐ। इन्सान गै क्रूर ते बे-क्यासा ऐ। उन्न प्रभु ने छित्तरी सौ पदार्थ बनाए दे माहनू आस्तै, पर उसदी फही तृप्त नेई होंदी ते ओह असें घाऽ-पत्तर खाने आहलें जीवेंगी मारियै अपनी जीहबा दे सुआद बनांदा ऐ।

माहनू दे बे-क्यासेपन ते क्रूरता दी अजकल ते हद गै होई गोदी ऐ। सुनेआ जे मेरठ (उत्तर प्रदेश) च बक्करें दे बपारी ईदुलज्जुहा ते बकरीद दे मौकै पर जिसलै सहाड़ी मांग बधी जंदी ऐ तां मती कोला मती रकम बट्टने दे लालच बस होइयै सहाड़े

केइयें भाएं दे मूहें च जबरदस्ती पानियै दी पाइप घुसेडियै बिजली दी मशीना दे जोर कनै उंदे ढिड्डे च इन्ना मता पानी भरी दिंदे न तां जे ओह बचारे मुट्टे बी ल'ब्बन ते कनै उंदा भार-बजन बी बधी जा इन्ना गै नेई एह बी सुनने च आया ऐ जे ओह कनीती ते क्रूर दिल बपारी सहाड़े भाएं दियें गुदें च हवा भरने आहली पाइप फसाइयै कम्पेशर कनै उंदे ढिड्डु फुलाई दिंदे न तां जे ओह बचारे बे-जबान जीव मते मुट्टे ल'ब्बन। जिस कनै उनें बे-दर्द बपारियें गी मती कीमत प्राप्त होऐ। एह सुनने च आया जे उंदियें इ'यै नेहियें कनीती हरकतें कनै सहाड़े भाऽ बे-होश होइयै डिगगी पे हे ते फही झट्ट अपने प्राण त्यागी बैठे हे। खरा होआ, कम से कम गाटे उप्पर कंसाइयें दे छुरे पौने कनै होने आहली शिदत दी पीड़ा कोला ते बचे होंड'ना। इस नकली तरीके ते धोखे-बाज रवेइयै कनै मुट्टे कीते दे बक्करें दे केई खरीददार घाट्टे च रेह हे, की जे जिसलै उनें बक्करें पशाब करियै सारा पानी कड्डी दिता हा तां उंदा बजन पैहलें दे असली बजन कोला बी घट्ट होई गोआ हा। एह क्रूर माहनू असेंगी बे-रैहमी कने मारने दे बाद सहाड़ियां मुंडियां घट्ट पैसें कनै जिनेंगी बेचदा ऐ ओह उनें गी राहड़ां लाई-लाइयै ते लून लाई-लाइयै घेड़ी-घूड़ियै खाई जंदे ना। उनें मुंडियें कनै भाएं छड़ी जीहब, कन्न, ओठ ते मूहें उप्पर पारला मास गै होंदा ऐ तां बी ओह समझदे उंदा जलसा होई गोआ। ते जेहड़े सहाड़े शरीरै दे चंगे ते 'एनर्जी' देने आहले हिस्से न, जियां गुदें, कपूरे, कलेजे बगैरा उंदे गाहक बी चंगी रकम खर्चने आहले होंदे ना। ओह ते इनें हिस्सें ते होरनीं जगहें दियें कीती दियें बोटियें गी शैल चाल्ली तली-तुलियै ते राहड़ां लाइयै पैगें दे दौर कनै हासा-मखौल ते गप-शप लाइयै लून-मर्चा लाइयै खंदे न तां ओह समझदे न जे अस हून सुर्गे दा गै झूटा लै करने आं। ते फही ओह उनें बोटियें च बची दियें हड्डियें गी चूसी-चूसी ते केई बारी बिंद चापी-चापी खंदे ना।

अजकल नेहियां मशीना चली पेदियां न जिंदे कनै मासे दा कीमा फटा-फट त्यार कीता जंदा ऐ। जिस्सी फही एह दूए दियें कबरें उप्पर अपने मैहल सजाने आहला माहनू लोहे दियें सीखें उप्पर लपेटियै तारियै अपने सुआद इस चाल्ली बी पूरा करदा ऐ। हद ऐ उआं इन्सानी फितरत दी जेहड़ी उस कोला चंगे-कोला चंगे ते बुरे कोला बुरे कम्म करोआइयै छोड़दी ऐ। उआं परमात्मा ने बी सहाड़े कनै बे-न्याई गै कीती दी ऐ। उन्न सारे हुनर माहनू दे गै हिस्से पाई दिते दे न जद के असें गी सिर्फ खाने, सौने ते संभोग करने दे सुआऽ दस्सेआ बी किश नेई। अकली दा सिर्फ उन्ना गै एंश साढै पल्लै पाए दा ऐ जिन्ने कनै साढियां एह त्रै जरूरतां पूरियां होई सकना। इस करी गै माहनू असें जीव-जन्तुएं कनै मन-मान्ना ब्यहार करदा ऐ। ओह अपनी जात कनै बी मन-मान्ने क्रूर जुर्म करदा ऐ। बाकी पशु-पक्खरूएं ते

होर जीव-जन्तुएं दी ते गल्ल गै छोड़ो। कदै-कदै ओह अपना नेहा राखसी रूप बनाई लेंदा ऐ जे उसदी कल्पना करदे गै कम्मनी आई जंदी ऐ। सुनेआं जे इक बड्डी उमरी दा जां जुआन ग'बरू माहनू त्रैं-चौं साझै दी बच्ची तक दे कन्नै बलात्कार करने दा निन्दनी दुष्कर्म करने कोला बी परहेज नेई करदा। लानत ऐ नेह माहनूएं गी। खबरै परमात्मा ने बी एह माहनू सिर्जने च केह खदाई (खुदाई = खुदापुना) कीती ही। भला रूप ऐ एह परमात्मा दी श्रेष्ठ सिस्टी रचना दा ? इस्सी अपने श्रेष्ठपुने दा इन्ना गमान ऐ होई गोदा जे हून एह जुर्म ते कमीनियें हरकतें दियें सारियें सीमें-गी पार करी गोदा ऐ।

किन्नी दर्दनाक बिडम्बना ऐ जे जिसलै आम दुनियां सुत्ती दी होंदी ऐ ते अस बकरा जात आहलें बी किट्टे होइयै जे सर्दी होऐ तां मिली-जुलियै ते गर्मी दा मौसम होऐ तां बी कोल-कोल बेहियै ऊंधी-ऊंधी राम करा करदे होने आं। उसलै उद्धर कुतै मन्दरै-ठौकरदुआरै च घैंटियें-घड़योलें दियां बाजां ते मसीतें चा मौलवियें दियां ते गुरुदुआरें चा शब्द पाठें दियां बाजां सनोचा करदियां होंदियां न, ठीक उसलै माहनू जाती दे राखसी रूप आइयै साढ़े उप्पर अपने डंडे बरसाइयै असेंगी तुआलदे न ते लेई चलदे न ज'बाखान्ने पाससै जित्थै जेकर मुसलमानें दे ज'बाखान्ने होन तां असें गी बारी-बारी ल्हाल करना शुरू कीता जंदा ऐ। उसलै अस भाएं किन्ने बै-बै करियै करलाचै साढ़ी कु'न सुनदा ? उनें कसाइयें चा किश पढ़दे जंदे ते किश साढ़ियां पिछलियां लतां पकड़ी रखदे ते किश साढ़े गाठें उप्पर अपने छुरें दे घोरे मारदे चलदे न ते जेकर हिन्दू-सिक्खें दे कसाईखान्ने होन तां दड़ादड़ छुरे, दराट ते होर किस्में दे सन्दर-थिहार साढ़ियें मुंडियें उप्पर ब'रन लगी पौंदे ना उंदे कन्नै असें गी मौती दा बड़ा गै घट्ट एहसास होंदा ऐ। उ'आं अज्जकल ते मशीनी कम्म होई गोदा ऐ जिसनै अस सैकड़ें दी तदाद च बी किश घैंटें बिच्च गै कटोइयै ढेर होई जन्ने आं। पही कटोने-बढोने दे इनें तरिकें कन्नै असेंगी पीड़ ते बड़ी होंदी पर साढ़े 'अरण्य रोदन' (जंगली रोने) गी कु'न सुनदा ऐ? हां, मिगी इन्नां जकीन जरूर ऐ जे ओह दयालू ते सब दा पालनहार प्रभु ते जरूर गै सुनदा होग साढ़े बब्याने-मम्याने गी, पर ओह बी केह करै असें गी ते अपने कर्में दा फल ते मिलियै रौहदा ऐ पही बी उ'स्सी एह ते बरदाशत नेई ऐ जे उस दी सिस्टी दे बेगुनाह जीवें गी जिंदे च ओह आत्मा रूप कन्नै बसदा ऐ, कोइ इस चाल्ली सताऽ ते तड़फाई-तड़फाई मारै की जे ओह ते श्रीमद्भगवद्गीता च अप्पू आखदा ऐ जे उसदा प्यारा ते ओह ऐ जेहड़ा जीव मातर दा हित करै (सर्वभूत हिते रतः) पर एह बी सच्च ऐ जे शायद साढ़ी जून इस्सै तरिके कन्नै कटोनी होंदी ऐ की जे विधाता दे लेखें च साढ़ी इयै नियति ऐ। इस लेई साफ ऐ जे इस कोला अस बची नेई सकदे। साढ़े इस कतले-आम गी साढ़ियां मातां

(बकरियां) अपने ढिड्डुं च जरूर मसूस करी-करियै अन्दरो-अन्दर तड़फदियां होंदियां होड न ते अपनियें अक्खीं चा मौन अत्थरूं बी बगांदियां होनियां न, की जे माऊ दी ममता नेही संवेदनशील होंदी ऐ जे अपनी सन्तानी दी दुख-तकलीफ कन्नै उ'स्सी जरूर चु'ब्बां लगदियां न ते खलबली मचदी ऐ, पर बचारियें ते बे-स्हारियें दी कु'न सुनदा उनें बचारियें दे बारे च एह मुहावरा "बकरे की मां कब तक खैर मनाएगी" ठीक गै बने दा ऐ। मती रहानगी आहली गल्ल ते एह जे जिसलै जींदी हालती च कुसै तथाकथत सभ्य जां पैसे जां अपने औहदे करी बड़ा मगरूरी होई गोदा होऐ जेकर अस इसदे ड्राईंग रूम च गलती कन्नै पुज्जी जाचै तां असेंगी डंडे मारियै बाहर कड्डी दिता जंदा ऐ जे कुतै स्हाड़ा पशाब जां मींगनां उंदे क्लीन उप्पर नेई पेई जान पर जेकर उस्सै लै असेंगी बड्डी टुक्कियै रि'न्नी-बनाइयै पलेटें च सजाइयै उस्सै ड्राईंग रूम च सजाई दिता जंदा तां चटाके लगदे। एह क्रूर इन्सान अपनी क्रूरता दे मौकै रडांदियें-करलांदियें इन्सानी मौरिं दे सामनै उंदे पुत्तें गी कतल करदा, उंदे टोटे-टोटे करी दिन्दा ते जां गोलियें कन्नै डुआई दिंदा ऐ। अज्ज दे उग्रवादी राखसें एह सब्ब प्रतक्ख करी दित्ते दा ऐ। पता नेई इस धरती उप्परा इन्सानियत की मिटदी जा करदी ऐ?

हून सुनो, साढ़ा इयां कतले आम होने दे बा'द साढ़ियें लाशें दी केह गत कीती जंदी ऐ? सब थमां पैहलें ते साढ़ियां चमडियां दरहोडियै उंदे बपारियें गी सौंपियां जंदियां न ते फही केइयें किस्में दे बाहनें उप्पर लदिदयै उनेंगी मास बेचने आहले कसाइयें गी उंदी जरूरता दे मताबक सौंपेआ जंदा ऐ, जेहड़े उनेंगी अपनियें-अपनियें दुकानें पर इस चाल्ली टंगदे न जे मुंडी थल्लै ते लतां उप्पर। इयां टंगना साढ़े लेई होर मता दुखदाई ऐ की जे साढ़ी मूत्र-इन्दरी ते अंडकोश सामनै लटकदे मते गै बुरे ते बेहूदा ल'बदे ना। एह ठीक ऐ जे जेहड़े साढ़े भ्राऽ मारी दित्ते गेदे न ते उंदे शरीर इयां टंगे जंदे न तां उनेंगी उसलै इसदी नां ते कोई पीड़ ते नां कटु अनुभूति रेहदी होंदी की जे-आप मरे तो जग प्रलेख आहले मुहावरे दे मताबक अपनी मौती दे बाद दुनिया र'वै जां प्रलय कन्नै खतम होई जाऽ उनें गी इस कन्नै केह बास्ता ? पर जेहड़े अस उन्दी एह हालत दिक्खने आं तां अस सोचने जे साढ़ी बी इक दिन इयै गत होनी ऐ जां कीती जानी ऐ। आखदे न जे भगत कबीर होरें आक्खेआ हा-

माली आवत देख के कलियां करें पुकार।

फूली-फूली चुन लई कलहिं हमारी बार॥

खैर इस बारे च मैं ते मेरे साथी पूरी चाल्ली परबस आं। उ'आं उस परम शक्ति दे विधान दे अगुं एह क्रूर इन्सान बी ते परबस ऐ पर इसदे केई भ्राऽ इन्ने अभिमानी

ते मगरूर होई जंदे न जे उसदे उप्पर साधुएं ते फकीरें दा असर गै नेई होंदा। हां, ते सुनो स्हाड़े धडें गी (यनी मेरे भ्राएं दे) पुट्टा करने दे परेंत गाहक औने शुरू होई जंदे केई पाऽ दे गाहक, केई अद्धसेरै ते केई उस थमां मते बजन दे मासै दे बगैरा - बगैरा। बस, फही केह् उनें पुट्टे टंगे दे धडें दी गति होनी शुरू होई जंदी ऐ। अर्थात् कसाइयें दे टोके कनै-टुकड़े-टुकड़े होइयै तलोन ते बिकन लगी पाँदे। हां, इक गल्ल होर जे स्हाड़े मासै दे गाहकें दियां परसिंदां बी बड़ियां नरालियां ते बक्खरियां-बक्खरियां होंदियां ना। अर्थात् कोई कलेजियै दा गाहक, कोई गुर्दे-कपूरें दा, कोई आम मासै दा (यनी कुतेआ बी होऐ) ते केई गरीब-गुरबे घट्टू पैसे खरचियै ओझरियें ते खरौडें कनै गै खुश। इयां जियां-जियां गाहकें दा जोर उआं-उआं गै साढे धडें दी टुकु-टुकुी दा बी जोर। केई साढियां मुंडियां बी सस्ते भाऽ खरीदियै भुन्नी-भन्नियै उंदे चा अपने खाने आस्तै किश न किश कडुढी गै लैंदे न, पर पता नेई उंदे चा उनें गी दन्दें, मसूडें, जीहबें ते कनें बगैरा दे सवाऽ केह् ल'बदा ऐ? चर्ज होंदा उंदे गाहकें दी भुक्ख ते लालच उप्पर।

बस, फही साढे शरीरें दे ओह् केई टुकड़े केइयें घरैं च पुज्जियै केई किस्में दे मसालें घ्यो ते तेलै बगैरा कनै लगी पाँदे रिज्जन-पक्कन। केई किस्में दा रूप लेई लैंदे अर्थात् खट्टा मास, मदधरा मास, पालके आहला मास ते सीख-कबाब, यखनी, रोगन जोश बगैरा बगैरा। आखदे न जे कश्मीरी लोक ते कोई सोहलें-सताहरें किस्में दा 'मीट' बनाने दे माहर ना। धन्न न ओह् लोक बी। खैर, जिसलै मीट दियां ओह् किस्मां त्यार होई जंदियां न तां फही डूंहगें ते पलेटें च सज्जियै टेवलें उप्पर जां भुंजां चटाइयें-दरियें बगैरा उप्पर सज्जी जंदियां ते पलै-खिनैं च उंदे शकारी एह् गत करदे माहनू साढी। अपना कोई मरी जाऽ तां उ 'स्सी बिधी-बधान कनै फूकी-जालियै उस दियां हड्डियां पजांदा ऐ हरिद्वार कनखल ते साढी एह् दुर्गत? अस बचारे पशु जात दे बक्करे जे ठैहरे! पर जिन्ना अस उससै दै कम्म औने आं इन्ना शायद गै कोई होर पशु जां जीव- जन्तु औंदा होऐ। हां, गौएं-बैलें दे बारे च अस गल्ल नेई करदे की जे ओह् हिन्दू जात आहलें दी धार्मक भावना दा प्रतीक बनी गेदे ना। नेई तां एह् साढा मास खन्दे स्हाड़े मादा रूप यनी बक्करियें दा (दौनीं रूपें-सधारण ते बीतल) दुद्ध पींदे ना। इंदे अज्ज दे युग दे सब थमां बड्डे नेता म्हात्मा गान्धी होर ते परसिन्द गै बक्करी दा दुद्ध करदे होंदे हे। उंदा आखना हा जे बक्करी दा दुद्ध चंगी दुआई आहला लेखा गुणकारी होंदा ऐ। गल्ल बी ठीक ऐ आयुर्वेद शास्त्र ने बी बक्करी दा दुद्ध बड़ा गै गुणकारी मन्ने दा ऐ। फही एह् माहनू साढी जत्त कतरी-कतरी बेचियै बड़ा बपार करदा ऐ ते पैसे कमांदा ऐ। आखदे न जे स्हाड़ियै जत्तु दियां केई चीजां

बनदियां ना। एह् कलीन बनाने च, मुट्टे कंबल बगैरा बनाने च कम्म औंदी ऐ। साढी चमड़ी कनै माहनू ढोल, ढोलकियां, तपले, डफले बगैरा केई वाद्य यन्त्र त्यार करदा ऐ। प्हाड़ी जां खान्ना बदोस लोक साढे चमड़े दे ख'ल्लडू बनाइयै उस च आटा, चौल बगैरा राशन भरियै इक थाहरै दा दूऐ थाहर लेई जंदे ना। साढियां मीडू नां माहनू अपने खेतरें च पाइयै उस हैलै कनै अपने खेतरें गी जरखेज बनाइयै खूब फसल ते फलदार बू'हटे पैदा करियै खुशहाल होंदा ऐ। इयां साफ ऐ जे साढे माहनू उप्पर बडे मते उपकार न पर माहनू इसदे बावजूद असें गी हकारत ते नफरत दी नजर कनै दिखदा ऐ। अस जींदे होचै तां स्हाड़ी मुश्क कोला बी त्राहियै असेंगी दूर रक्खने दी कोशश करदा ऐ। पर अस बचारे कोहदे अगैं अपनी दाद-फरियाद करचै। कोई सुनने आहला होऐ तां के। इस धरती उप्पर साढे लेई ते एह् स्हाब ऐ जे "अ'नै अगैं नच्चे दा ते बोलै अगैं गाए दा।" असें बक्करेंगी अफसोस ते इस गल्ला दा ऐ जे स्हाड़े कनै कीते जाने आहले नेह जुल्में ते बे-क्यासे ब्यहार कनै माहनू जाती दे अपनी संवेदनशीलता दा ढंडोरा फेरने आहले कवि ते लेखक लोक बी बिंद बी पिघलदे नेई ना। हां डोगरी-कवि मास्टर ज्ञान चन्द ज्ञान होर इस गल्ला दे जरूर अपवाद न जिनें अपनी 'कालीभक्ति' शीर्शक कविता दियें इनें पंक्तियें च स्हाड़े प्रति अपनी हमदर्दना भावना अभिव्यक्त कीती दी ऐ-

एह् मुट्टे-मुट्टे बक्करे, तूं कीते निके डक्करे,
बडे बबेआए जेल्लै बड्डे, एह् न पाप अक्करे।

०००